

Bukti kerjasama PN masih kukuh

SHAH ALAM - Pelantikan Datuk Saarani Mohamad sebagai Menteri Besar Perak ke-14 bukti pengukuhan kerjasama antara tiga parti dalam Perikatan Nasional (PN) masih terjalin.

Demikian pandangan Pensyarah Kanan Fakulti Komunikasi Universiti Putra Malaysia (UPM), Dr Syed Agil Alsagoff setelah kemelut politik Perak berakhir dengan baik dalam tempoh singkat.

Beliau berkata, pemilihan Saarani dibuat setelah UMNO berkompromi dengan Parti Pribumi Bersatu Malaysia (Bersatu) dan Pas biarpun menghadapi isu-isu berkaitan politik antara mereka.

“Itu petanda baik bagi ketiga-tiga parti itu yang memilih langkah untuk mengelakkan konfrontasi politik sekali gus memilih mengutamakan kepentingan rakyat dan negeri berbanding kepentingan parti.

“Ia juga menjadi keperluan asas pengukuhan perjuangan Muafakat Nasional untuk memperjuangkan kepentingan politik Melayu Islam dan memberi pengukuhan keyakinan terhadap kerajaan PN yang dipimpin Tan Sri Muhyiddin Yassin,” katanya.

Mengulas lanjut, Syed Agil percaya Saarani akan memberi keutamaan kepada soal perpaduan parti-parti politik dengan mengagihkan kedudukan portfolio Exco kepada keanggotaan parti-parti yang menyokong pembinaan kerajaan negeri yang baharu dengan mengambil kira sokongan Bersatu dan Pas dalam komponen tersebut.

“Beliau juga harus memberi keutamaan kepada pelaburan ekonomi, merencanakan ekonomi domestik selain memastikan kebajikan rakyat terus terbela dengan ancaman pandemik Covid-19,” ujarnya.